

«12» հունվարի 2017թ.

ք. Երևան

Հայաստանի Հանրապետության կառավարությանն առընթեր պետական եկամուտների կոմիտեի միջազգային ճանապարհային փոխադրումների տարածաշրջանային մաքսատան պետի Ժ/պ Մելսակ Ղազարյանս, ուսումնասիրելով <<ՎԼՀԱՔ>> ՍՊ ընկերության /ՀՎՀՀ 00439827, հասցե՝ ք. Երևան, Ազատամարտիկների 156/1/ կողմից «Բաց թողնում՝ ներքին սպառման համար» մաքսային ընթացակարգով 31.01.2014 թվականի թիվ C 566 ապրանքների հայտարարագրով հայտարարագրված ապրանքների մաքսային ձևակերպման փաստաթղթերը.

### Պ Ա Ր Զ Ե Ց Ի

<<ՎԼՀԱՔ>> ՍՊ ընկերության կողմից 31.01.2014 թվականի թիվ C 566 ապրանքների հայտարարագրով «Բաց թողնում՝ ներքին սպառման համար» մաքսային ընթացակարգով հայտարարագրվել է սարքավորումներ: Նշված հայտարարագրի համաձայն ԱԱՀ-ի վճարումը հետաձգվել է մեկ տարի ժամկետով, սակայն ընկերության կողմից ԱԱՀ-ի վճարումը սահմանված ժամկետում չի կատարվել:

ՀՀ ԿԱ ՊԵԿ ՄՃՓ տարածաշրջանային մաքսատան ԳՀՀ բաժնի կողմից 09.12.2016 թվականին տրված տեղեկանքի համաձայն <<ՎԼՀԱՔ>> ՍՊ ընկերության ԱԱՀ-ի գծով բռնագանձման ենթակա գումարը կազմում է 1.142.185 ՀՀ դրամ տույժ:

Նշված փաստի առթիվ ՀՀ ԿԱ ՊԵԿ ՄՃՓ տարածաշրջանային մաքսատանը հարուցվել է վարչական վարույթ <<ՎԼՀԱՔ>> ՍՊ ընկերության կողմից վճարման ենթակա ԱԱՀ-ի նկատմամբ հաշվարկված տույժի գումարների գանձման նպատակով, ինչի առթիվ 2016 թվականի դեկտեմբերի 28-ին հրավիրված լսումը չի կայացել ծանուցումը չստանալու հիմքով: Նոր լսումը նշանակվել է 2017 թվականի հունվարի 12-ին ժամը 15:00-ին, ինչի մասին ծանուցումները առաքվել են ընկերության գրանցման և տնօրենի հասցեներով, սակայն ստացման մասին ծանուցումները երկու դեպքում էլ ետ չեն վերադարձվել:

ՀՀ Սահմանադրության 60-րդ հոդվածի 8-րդ մասը սահմանում է, որ յուրաքանչյուր ոք պարտավոր է մուծել օրենքին համապատասխան սահմանված հարկեր, տուրքեր, կատարել պետական կամ համայնքային բյուջե մուտքագրվող պարտադիր այլ վճարումներ:

«Հարկերի մասին» ՀՀ օրենքի 14-րդ հոդվածը սահմանում է Հայաստանի Հանրապետությունում պետական հարկատեսակները, որոնցից է ավելացված արժեքի հարկ:

«Ավելացված արժեքի հարկի մասին» ՀՀ օրենքի 6-րդ հոդվածի 4-րդ մասի համաձայն՝ ԱԱՀ-ով հարկվող գործարքներ (գործառնություններ) են համարվում՝ «Բաց թողնում՝ ներքին սպառման համար» մաքսային ընթացակարգով ապրանքների ներմուծումը, բացառությամբ օրենքով նախատեսված դեպքերի:

«Ավելացված արժեքի հարկի մասին» ՀՀ օրենքի 21-րդ հոդվածի համաձայն՝ Հայաստանի Հանրապետություն ապրանքների ներմուծման դեպքում (բացառությամբ ԵՏՄ անդամ պետություններից կատարվող ներմուծման դեպքերի) մաքսային մարմինների կողմից ԱԱՀ-ի հաշվարկումը և գանձումը հիմնավորվում է մաքսային ձևակերպման ժամանակ լրացվող մաքսային հայտարարագրերով և վճարային փաստաթղթերով (վճարման հանձնարարագիր, անդորրագիր կամ վճարումը հաստատող այլ փաստաթղթեր):

Նույն օրենքի 6.1-րդ կետի 1-ին մասի համաձայն՝ ԱԱՀ վճարող համարվող անձանց կողմից ԱՏԳԱԱ 841920000, 841990150, 8422 (բացառությամբ 842211000 և 842290100 ծածկագրերի), 8426, 8429, 8430, 8435, 8441, 84431, 8452 (բացառությամբ 845210 և 845290000 ծածկագրերի), 8453, 8475, 8478, 8479, 85023100 կամ 870410 ծածկագրերին դասվող ապրանքների ներմուծման (այդ թվում՝ ԵՏՄ անդամ պետություններից ներմուծման) մասով հաշվարկված ԱԱՀ-ի գումարների պետական բյուջե վճարման ժամկետը հետաձգվում է, բացառությամբ սույն հոդվածով սահմանված դեպքերի՝

1) հայտարարագրման օրվանից մեկ տարի ժամկետով, եթե նշված ծածկագրերին դասվող ներմուծված ապրանքների մաքսային արժեքը պակաս է 70 մլն դրամից.

2) հայտարարագրման օրվանից երկու տարի ժամկետով, եթե նշված ծածկագրերին դասվող ներմուծված ապրանքների մաքսային արժեքը կազմում է 70 մլն դրամ և ավելի.

3) հայտարարագրման օրվանից երեք տարի ժամկետով, եթե նշված ծածկագրերին դասվող ներմուծված ապրանքների մաքսային արժեքը գերազանցում է 300 մլն դրամը:

Նույն մասի 5-րդ պարբերության համաձայն՝ հետաձգված ԱԱՀ-ի գումարները ենթակա են վճարման պետական բյուջե մինչև ժամկետը լրանալու օրը:

Նույն հոդվածի 3-րդ մասը սահմանում է, որ սույն հոդվածի առաջին և երկրորդ մասերով սահմանված ժամկետում ԱԱՀ-ի գումարները չվճարվելու դեպքում օրենքով սահմանված տույժերի հաշվարկումը և այդ գումարների նկատմամբ հսկողությունն իրականացնում է մաքսային մարմինը:

«Մաքսային կարգավորման մասին» ՀՀ օրենքի 115-րդ հոդվածի 1-ին մասի համաձայն՝ տույժեր են համարվում սույն հոդվածով սահմանված այն դրամական գումարները, որոնք մաքսատուրք, հարկեր վճարողը պարտավոր է վճարել Միության մաքսային օրենսդրությամբ և (կամ) Հայաստանի Հանրապետության մաքսային օրենսդրությամբ սահմանված ժամկետներում մաքսային վճարները չվճարելու կամ ոչ ամբողջությամբ վճարելու դեպքում:

Նույն հոդվածի 2-րդ մասի համաձայն՝ մաքսատուրքի, հարկերի վճարումը սահմանված ժամկետներից ուշացնելու դեպքում ժամկետանց յուրաքանչյուր օրվա համար վճարողից գանձվում է տույժ՝ ժամանակին չվճարված մաքսատուրքի, հարկի գումարի 0,15 տոկոսի չափով, բայց ոչ ավելի, քան 365 օրվա համար, բացառությամբ սույն օրենքով և Միության մաքսային օրենսգրքով և իրավապայմանագրային բազան կազմող պայմանագրերով նախատեսված այն դեպքերի, երբ հայտարարատուին կամ նրա լիազորած անձին տրամադրվել է մաքսատուրքի, հարկերի վճարման հետաձգում:

«Մաքսային կարգավորման մասին» ՀՀ օրենքի 114-րդ հոդվածի 1-ին մասի համաձայն՝ մաքսատուրքի, հարկերի՝ դրանց գծով տույժերի, տոկոսների վճարման պարտավորությունը սույն օրենքով սահմանված կարգով և ժամկետում չկատարելու դեպքում դրանց բռնագանձումը մաքսային մարմինների կողմից իրականացվում է օրենքով սահմանված կարգով՝ մաքսատուրք, հարկեր վճարողի միջոցների կամ այն ապրանքների արժեքի հաշվին, որոնց համար մաքսատուրքերը, հարկերը չեն վճարվել:

Հիմքում ունենալով վերոգրյալ իրավակարգավորումների ամբողջությունը, հիմք ընդունելով ՀՀ ԱԱՀ-ի ընկերության կողմից 31.01.2014 թվականի թիվ C 566 ապրանքների հայտարարագիրը, ՀՀ ԿԱ ՊԵԿ ՄՃՓ տարածաշրջանային մաքսատան ԳՀՀ բաժնի կողմից 09.12.2016 թվականին տրված տեղեկանքը՝ ՀՀ ԱԱՀ-ի ընկերության կողմից վճարման ենթակա 1.142.185 ՀՀ դրամ ԱԱՀ-ի տույժի գումարները ժամանակին չվճարելու հիմքով ենթակա են բռնագանձման:

Ելնելով վերոգրյալից և ղեկավարվելով ՀՀ Սահմանադրությամբ, Մաքսային միության մաքսային օրենսգրքով, «Մաքսային կարգավորման մասին» ՀՀ օրենքով, «Հարկերի մասին» ՀՀ

օրենքով, «Ավելացված արժեքի հարկի մասին» ՀՀ օրենքով և «Վարչարարության հիմունքների և վարչական վարույթի մասին» ՀՀ օրենքի 7-րդ գլխի դրույթներով՝

## Ո Ր Ո Շ Ե Ց Ի

1. <<ՎԼՀԱՔ» ՍՊ ընկերությունից հոգուտ պետական բյուջեի բռնագանձել 1.142.185 ՀՀ դրամ՝ որպես ԱԱՀ-ի նկատմամբ հաշվարկված օրական տույժի գումար:
2. Որոշման մասին օրենքով սահմանված կարգով տեղյակ պահել <<ՎԼՀԱՔ>> ՍՊ ընկերությանը /ք. Երևան, Ազատամարտիկների 156/1/:

Սույն որոշումն ուժի մեջ է մտնում դրա ընդունման մասին իրազեկելուն հաջորդող օրը և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադատության կարգով կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

ՄՃՓՏՄ ՊԵՏԻ Ժ/պ



Մ. ՂԱԶԱՐՅԱՆ